



Selasa, 02 Januari 2024

Ogen: Job 1:4



"Pulung Ras-ras"



Salah sada kesemalen i bas tahun baru e me pulung radu ras keluarga. Keluarga si ndauh mulih ku kuta entah keluarga si i kuta reh ndahi keluarga si tading i kota. Intina maka i bas kita ertahun baru e pulung radu ras kerina keluarga.

Anak-anak Job semal pulung lako man-man ras turangna. I bas pulung e kerina ia ermeriah ukur, mburo ate tedeh. Kesemalen si ibahan anak-anak Job enda mehuli kel ilakoken. Sebabna arah kinipulungen bas jabu, banci si eteh terbagesen kerna hubungan sada ras sidebanna. I je kita banci nuri-nuri pengalamen si enggo i bentasi. I je ka kita cerita meriah-meriah radu tawa. Arah e sietehen kita pekepar kerna kecibal geluh keluarganta. Turah pe ateta keleng, turah ate mekuah, janah turah ukur sisampat-sampaten. Pulung ras keluarga e sada perbahanen si mehuli. Tahun baru e sada kesempaten mpepulung keluarganta. Adi anak-anak Job erbahan pesta, man-man ia, minem anggur ras manggang-manggang. Mehuli pe enda silakoken rikutken kengasupenta, labo min pangan entah kai si man panggangen si perlu tapi ketedehen ateta lako banci jumpa ras keluarga; mengenang paksa-paksa si lewat, berbagi cerita, nuri-nuri, tawa radu ras keluarga.

Rikutken keperluan/kebutuhen i bas jaman gundari enda, maka ketedehen ate lako pulung radu ras keluarga nggo lit perkurangnna. E maka hubungan kekeluargaan pe reh urakna. Adi nggo kurang ketedehen ate, tentuna kekelengen e pe enggo urak. Lanai sieteh uga kecibalna, kai persoalen si man alankenna, i bas kai kita banci nampati ia. Si mekelekna, anak-anak tengah jabu lanai ietehna tuturna man mama ras mamina, bibi ras bengkilana. Mama ras mami pe la tandaina beberena, bibi bengkila pe la tandaina permenna. Perlu ijadwalken pulung radu ras kelarga; tupung acara tahun baru, natal keluarga entah arisen keluarga (tuan ras Nyonya rumah banci bergantian). Kinipulungen e banci mburo ate tedeh.